

SANTISSIME TRINITÂT

Solenitât

Jutoris pe Liturgjie

Domenie, ai 16 di Jugn dal 2019

Dopo che o vin partecipât a lis liturgjiis dal Avent e dal Nadâl, de Coresime e de Pasche, la glesie nus invide vuê a contemplâ il misteri intim di Diu. E sarès cheste une imprese fûr di ogni prospietive umane se no nus fos rivelât cualchi fruçon te peraule e tai fats de vite di Gjesù. Di fat al dîs S. Zuan: Diu nissun no lu à mai viodût; però lui al zonte a nestre consolazion: L'unigjenit di Diu, chel che al è tal grim dal Pari, propit lui nus al à pandût (Zn 1, 18).

Cjapìn duncje coragjo tal scrutinâ ce che voli nol à mai viodût e orele sintût (cf. 1 Cor 2, 9); tignìn però presint che se la sience moderne e pon come so limit il dubit, l'erôr e il dirit a cambiâ ponts di riferiment, se pe filosofie ogni secul al da la sô rispueste ma lis domandis a restin simpri chês, ce podìno pratindi de teologjie che e talpine al di sore de sience e al di là dal resonament?

Fra i grancj teolics, une des miôr riflessions sul misteri che vuê o celebrìn nus ven dade de bande di S. Tomâs di Aquin; dopo di vê detadis miârs e miârs di pagjinis su Diu, a la fin de sô vite lui al à concludût: "Diu si lu onore tasint".

Cheste umiltât nus è necessarie tal introdusisi a la liturgjie di vuê li che si cjatìn daprûf dal prin misteri de nestre fede: Unitât e Trinitât di Diu.

Intant però o disìn insiemi:

Antifone di jentrade

Benedet Diu Pari,
e l'unigjenit Fi di Diu
e il Spirtu Sant:
parcè che grant al è stât il so boncûr par nô.
Si dîs Glorie a Diu.

Colete

Diu, che mandant tal mont
il Verbo di veretât e il Spirt di santitât
tu âs rivelât ai oms il to misteri maraveôs,
danus la gracie che, professant la vere fede,
o podìn ricognossi la glorie de eterne Trinitât
e adorâ l'Unitât te potence de maiestât.
Pal nestri Signôr Gjesù Crist to Fi, ch'al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE

Pr 8,22-31

Prime che la tiere e fos, la Sapience e je stade parturide.

La sience di vuê e je magnifiche cuant che nus cjacare di "Big Bang, di fisiche quantistiche, di inflazion, di bosons...", magnifiche ma ancje tant profonde che jo no capîs un "et". I mancje però une clâf, e cence di chê no si vierç pal om nissune puarte: chest mont ajal un significât pe mê vite?

La rispueste che si riespire te nestre societât e à un non ben precîs: "nichilism": il mont e la vite no àn nissun sens. Ma pal cristian nol è cussì. La leture di vuê nus vise che: prime dal Big Bang e dai bosons al operave e al opere Diu cu la sô sapience colme di gjonde di amôr. Di fat: la

Sapience di Diu e fevele: Il Signôr mi à creade sul scomençâ de sô vore, *e e zonte*: e la mê gjonde a jerin i fis dal om.

Sêstu benedet, Signôr: lis cent o mil mlions di galassiis dal cîl come la mê infinitesime vite a cjapin il lôr just significât e valôr dome midiant di te e in te.

Dal libri dai Proverbis

La Sapience di Diu e fevele:

«Il Signôr mi à creade sul scomençâ de sô vore,
prin des sôs oparis plui vieris.
De eternitât o soi stade metude,
dal imprin, prin ancjemò de tiere.
Cuant che no jerin nancjemò i abîs o soi stade parturide,
cuant che no jerin lis risultivis des agonis fondis.
Prin ch'a fossin plantadis lis monts,
prime dai çucs jo o soi stade parturide.
Nol veve nancjemò fate la tiere e lis campagnis
e lis primis robis de tiere.
Cuant che al pontà il cîl, jo o jeri li,
cuant che al stabilì la volte dal cîl parsore dal abîs.
Cuant che al ingrumà i nûi dal cîl,
cuant che al sierà lis nassints des grandis aghis.
Cuant che i metè al mâr la sô leç,
par che lis aghis no lessin cuintri de sô peraule;
cuant che al pontà lis fondis de tiere,
jo o jeri cun lui tant che architè,
e o jeri la sô ligrie di dopo di,
consolantmi di un continuo denant di lui,
ricreantmi su la face de tiere,
e la mê gjonde a jerin i fis dal om».

Peraule di Diu.

SALM RESPONSORIÂL

dal Sal 8

La riflessione su la Sapience di Diu e devente culi meditazion; si mude daspò te contemplazion des oparis di Diu e te ricognossince pal puest che il Signôr al à riservât a la persone umane - om / femine - te armonie de creazion. O podìn ben dî:

R. Signôr nestri Diu, cetant grant ch'al è il to non sun dute la tiere.

Cuant che la vore des tôs mans, i cîi, o cjali,
la lune e lis stelis che tu lis âs pontadis,
ce esal mo l'om, che di lui tu ti visis,
il fi dal om, che simpri tu lu pensis? **R.**

Propit, tu lu âs fat a pene plui piçul dai agnui,
di glorie e di onôr tu lu cerclis;
su la vore des tôs mans tu i âs dade paronance,
e sot dai siei pîts dut tu âs metût. **R.**

Ducj i bûs e dutis lis pioris
e dutis lis bestiis de campagne,
i ucei dal cîl e i pes dal mâr,
ch'a corin pai trois sot aghe. **R.**

SECONDE LETURE

Rm 5,1-5

O lin a Diu midiant di Crist, tal amôr che il Spirt al à semenât in nô.

In pàs cun Diu... midiant di nestri Signôr... in fuarce dal Spirtu Sant... *La companie di Diu Pari, Fi e Spirtu Sant nus è dongje massime tal moment des tribulazions e e cambie il timp dal marum in timp di pazienze, di virtût provade e di chês sperance che no lasse malapaiâts, pal fat che...*

De letare di san Pauli apuestul ai Romans

Fradis, justificâts pe fede, o sin in pàs cun Diu midiant dal nestri Signôr Gjesù Crist. Midiant di lui o vin vude ancje la jentrade, pe fede, in cheste gracie che si cjatìn e si vantìn te sperance de glorie di Diu. No dome, ma si vantìn parfin des tribulazions, savint che la tribulazion e fâs nassi la pazienze, la pazienze une virtût provade, la virtût provade la sperance. E la sperance no lasse malapaiâts, pal fat che l'amôr di Diu al è stât strucjât tai nestris cûrs in fuarce dal Spirtu Sant che nus è stât dât. Peraule di Diu.

Secuence BENEDICTA SEMPER

Cheste secuence de nestre glesie di Aquilee e comence a frêr cu la classiche dotrine su la Sante Trinitât par slargjâsi subit te poesie dal univers intîr: Lu onorin lis stelis, i mârs, la tiere, i cjamps. Subit dopo al ven l'invî a ducj nô di dâ sù un Vive! Vive! che al rivi fint in cîl.

La secuence si conclût cuntune incorade invocazion a la Trinitât - Protêç dut il nestri popul - e cu la juste adorazion: Ti adorin, Onipotent... pai infinîts secui dai secui.

Ch'e sedi simpri benedete la sante Trinitât:

vadi la unitât e la steshe glorie.

Pari, Fi e Spirtu Sant:

i nons a son trê ma une steshe la sostance.

Diu il gjenitôr e Diu il gjenerât

e il Spirtu Sant compagn inte steshe deitât.

No son però trê dius;

il Diu vêr al è un sôl:

il Pari Signôr, il Fi e il Spirtu Sant.

La proprietât e je tes personis,

inte essence e je la unitât.

A an ducj la steshe maiestât e potestât;

e cussi la glorie e l'onôr in dut compagns.

Lu onorin lis stelis, i mârs, la tiere, i cjamps

insieme cun dut ce che al è stât creât.

L'infier selerât si spirte denant di lui,

ma ancje l'abis plui font lu onore.

Cumò ogni vôs e ogni lenghe

che i professi la laude convenient.

Lu laude il soreli e la lune,

lu adora ancje la dignitât dai agnui.

Ancje nô ducj insieme a grande vôs

din sù cuntun biel intono lis cjantis e la musiche.

“Vive! Vive!” cjantin cumò ducj insieme

al Diu sentât te sô alte sente lis laudis fint in cîl.

O venerabil Trinitât,

o adorabil Unitât:

midiant di te o sin creâts, vere eternitât,

midiant di te o sin sfrancjâts, caritât cence fin.

Protêç dut il nestri popul;
salve, libere, vuarde e smondee.
Ti adorin, Onipotent,
a ti o cjantìn, a ti la laut e la glorie,
pai infinîts secui dai secui.

CJANT AL VANZELI

Cf. Ap 1,8

R. Aleluia, aleluia.

Glorie al Pari, al Fi, al Spirtu Sant:
a Diu ch'al è, ch'al jere e ch'al ven.

R. Aleluia.

VANZELI

Zn 16,12-15

Dut ce ch'al à il Pari al è gno. Il Spirt al cjaparà sù di me e us al contarà a vualtris.

Chest vanzeli nus done un struc di teologjie de Sante Trinitât, struc tant afetuôs e familiâr che dome l'evangelist Zuan al podeve regalâus.

Culî la Sante Trinitât no je un fumul misteri lontanon tai cûi dai cûi ma une famee li che Pari, Fi e Spirtu Sant nus son dongje unîts, insiemi, ma ancje ognun cul so regâl.

La Sante Trinitât e je un Diu unic che tal amôr al gjenere; par chest motîf lu contemplin Pari, Fi e Spirtu Sant; però Pari, Fi e Spirtu Sant tal amôr ul pal altri a diventin dutun, unic Diu.

Lis nestris fameis, nudridis de peraule di Gjesù, a puedin diventâ te lôr unitât-diviersitât, une olme vivent dal misteri de Sante Trinitât.

Dal vanzeli seont Zuan

In chê volte, Gjesù al disè ai siei dissepui: «O ai di dñus ancjemò tantis robis ma par cumò no rivaressis a quartâlis.

Cuant che al vignarà lui, il Spirt di veretât, us menarà a la veretât dute interie. Di fat nol fevelarà par cont so, ma us disarà ce ch'al sintarà e us contarà ce ch'al à di vignî. Lui mi glorificarà parcè che al cjaparà sù di me e us al contarà.

Dut ce ch'al à il Pari al è gno. Par chel us ai dit ch'al cjapapà sù di me e us al contarà a vualtris».

Peraule dal Signôr.

Si dñs O crôt.

Su lis ufiertis

Santifiche, Signôr nestri Diu,
pe invocazion dal to non chescj regâi de nestre suditanee
e midiant di lôr fasinus diventâ ancje nô une ufierte eterne.
Par Crist nestri Signôr.

Prefazi:

Il misteri de Santissime Trinitât.

V. Il Signôr cun vualtris.

R. E ancje cun te.

V. Adalt i cûrs.

R. Ju vin viers il Signôr.

V. Vin agrât al Signôr nestri Diu.

R. Al è just e sacrosant.

Al è propit just e sacrosant, al covente e al da salvece
vêti agrât simpri e dapardut,

Signôr, Pari sant, Diu onipotent e eterni:

Cul to Fi Unigjenit e cul Spirtu Sant

tu sês un sôl Diu e un sôl Signôr,

no inte Unitât di une sole persone
ma inte Trinitât di une uniche sostanze.
Ce che, par tô rivelazion, o crodin de tô glorie,
cu la stesse fede e cence diference
lu proclamìn ancje di to Fi
e dal Spirtu Sant.
Tal confessâ la tô vere e eterne Divinitât,
si adore la distinzion des personis,
l'unitât de sostanze,
la paritât de maiestât.
Ti laudin i Agnui e i Arcagnui,
i Cherubins e i Serafins,
che no fermin di clamâti ogni dì, disint a une sole vôs:
Sant, Sant, Sant al è il Signôr Diu di dut il mont...

Antifone a la comunion

Ga 4,6

Dal moment ch'ò sês fîs,
Diu al à mandât il Spirt di so Fi tai vuestris cûrs,
Spirt ch'al berle: Abà, Pari.

Daspò de comunion

Ch'a zovin, Signôr nestri Diu,
pe salût dal cuarp e da l'anime,
chest sacrament ch'ò vin ricevût,
e la profession de nestre fede te eterne Trinitât
e te sô indivisibil Unitât.
Par Crist nestri Signôr.

**Te liturgjie aquileiese e vignive celebrade te ultime domenie dal an liturgjic.*

* * *

Cjants

Libri Hosanna, sot dal titul Eucaristie: messe, benedizion eucaristiche, rîts e cjants; dal n.7 al n.62 comprendût.

* * *

De solenitât de Ss. Trinitât dal 2016 fin a vuê nus àn compagnât lis riflessions di pre Antoni Beline ripuartadis dai siei coments in "Vanzeli par un popul" dai agns A - B - C-. Cumò o vin concludût il cicli, ma no molin pre Antoni.

Al continuerà a compagnânus insiemi a la peraule di altris furlans / furlanis dal sigûr mancul cognossûts di lui ma che a restin mestris, profetis e sapients pe liberazion dal nestri popul e par une gnove glesie incjarnade in cheste tiere, storie e culture dal patriarcjât di Aquilee.

Saludant pre Antonin e ringraziantlu, i lassin di gnûf la peraule:

La veretât (de Ss. Trinitât) e je devant di nô, lontane, trassendent che no rivin a brincâle. L'impuartant al è di no sintîsi disperâts, ma, cognossint i nestris limits esistenziâi, fâsi cjapâ par man di Diu e fâsi menâ di lui te veretât complete. Tant a dî fâsi compagnâ tal mieç dai câs vite, bieî e bruts fin che o rivarìn sul soiâr dal grant misteri.

Pratindi di rivâ a la veretât complete o di vêle za te sachete e je rude blesteme e matetât. Lassâsi menâ par man di Diu e je sapience grande e furtune di no crodi.

Vanzeli par un popul, an C. p.99.

* * *

- * *I cjants, salms e cjantadis a vegnin ripuartâts cu la numerazion dal libri: Hosanna, Cjants e preieris dal popul furlan, Ed. Glesie Furlane, 2012.*
- * *Il cjant dai salms resposoriâi, Ed. Glesie Furlane, 2012.*
- * *50 corâi de cristianitât todescje voltâts par furlan, ed. Glesie Furlane, 2016.*
- * *Il libri des riflessions sul Vanzeli al è: pre Antoni Beline, Vanzeli par un popul, an B, Ed. La Nuova Base.*
- * *Par domandâ chescj libris scrivêt a info@glesiefurlane.org*